

# N depot por esponac y azessurs

I laürs al Museum Ladin sön Tor à metü man



**Dlungia al Museum Ladin àn metü man da ciavè por fà n depot sot tera.**

**Laürs publics** - Pro le Ciastel de Tor àn metü man da ciavè grunt por fà n depot por le Museum Ladin. Te passa diesc agn de ativité dl museum é le bojègn, da podèi mète ia esponac te n post adatè, gnü trës majer. L'Assessorat provincial por i laürs publics mèt a desposiziun cun chësta investiziun n tòch de strotöra implü por l'ativité culturala ladina. Le depot dl Museum Ladin vëgn fat daldöt sot tera, al medemo nivel dl'alzada olache al vëgn fat les mostres. Chisc dis àn metü man da ciavè a na moda da ti fà lerch a na cubatöra de 1.750 m3. Le depot proietè é gran feter 400 metri

cuadrac. Dlungia l'aredamënt adatè por la conservaziun di esponac él ince de gran importanza da avèi la dërta temperatöra y le dër' grè de töme, acioche les pitöres, i documënc y i esponac plü ziti ne se rovines nia cun le tëmp. Tl proiet él ince odü danfora n lift por menè i esponac plü pesoç tl depot sot tera y da ilò ince tl salf dles mostres. Le museum ne n'é nia ma gnü fat por mostrè sö la cultura ladina, mo ince por fà inrescides y archivié testimonianzes de nosta vita ladina. "Cun na investiziun de 814.828,00 euro podunse mète a desposiziun n post adatè, acioche al pois gnü laurè ciamò damì te

chësc cìamp cultural", dij l'assessor Florian Mussner. Al é preodü da stlü jö i laürs d'isté. Por surandè chisc laürs él gnü damanè set firmes. La firma Bioc Bau é stada la sóra che à tut pert al concurs y à insciö cialè la inciaria. Le depot rové ne sarà nia davert al publich, "impò gnaràl arjigné a na manira che al sides interessant da odèi por esperè y jënt competènta", spliga Heinrich Huber, presidènt dl comitè scientific dl Museum Ladin. Na manira moderna da visualisé y cataloghisé i esponac porta pro a na revalutaziun por le Museum, sottrissèia le presidènt. *(ofize stampa provincial/as)*